

Il rendit compte au Pere, des instructions qu'il luy avoit données; il l'affeura qu'il s'estoit toûjours servi de la priere, qu'il luy avoit enseignée; & qu'il n'avoit point eu recours à ses superstitions, sinon en vne feule rencontre: mais qu'il en estoit bien marry; Qu'il avoit vne grande apprehension de tomber dans ces feux cachez au milieu de la terre; Qu'il se portoit de tous les desirs de son cœur, pour ce beau lieu, où Dieu recompense à jamais, ceux [73] qui luy ont obeï en cette vie.

Après vne suffisante instruction, luy, sa mere, sa femme, & quatre de ses enfans, furent baptisez solemnellement, dans vne petite Chapelle, que les François dresserent avec beaucoup de zele, estant bien-aïses de cooperer à cette bonne œuvre; & connoissans tous que Dieu ne les avoit preservez des dangers de la mort, dans lesquels ils s'estoient trouvez, qu'à la consideration de ces pauvres Sauvages, auxquels il vouloit faire misericorde par leur moyen, les ayant obligez de faire quelque sejour en ce poste, par la violence d'un vent contraire.

Ces bons Neophytes assisterent avec beaucoup de devotion, à la Messe qui y fut celebrée tous les jours: en fuite dequoy, Dieu donnant un vent favorable, ils arriverent [74] en peu de temps à Tadoussac, & de-là, à Quebec, le jour de Sainte Anne, qu'ils avoient choisie, pour vne des Patronnes du voyage.